

西  
征  
道  
里  
記

鄭剛中撰

中  
華  
書  
局

西征道里記

此據金華叢書本  
排印初編各叢書  
僅有此本

## 西征道里記原序

紹興乙未。上以陝西初復。命簽書樞密樓公。諭以朝廷安輯混貸之意。某以祕書少監。被旨參謀。是役也。審擇將帥。屯隸軍馬。經畫用度。詢訪疾苦。振恤隱孤。表揚忠義。公皆推行如上意。故其本末次序。屬吏不敢私錄。至於所過道里。則集而記之。雖搜覽不能周盡。而耳目所際。亦可以驗遺蹤。而知往古。與夫兵火凋落之後。人事興衰。物情向背。時有可得而窺者。以其年四月二十二日。舟出北關。六月二十四日。至永興。七月十三日。進至鳳翔。越三十七日。府告無事。公率官吏以歸。水陸凡六十驛。往來七千二百里。本計七千

一百九十汜水里。以未至縣十里。河水南浸。自壘子拔移路旁山。回程衍十里。

右通直郎、尚書、戶部員外郎李若虛參議。左朝請大夫、新差知吉州軍州

事江少虞。左朝請郎、新除陝西轉運副使姚焯。機宜。右從事郎、新湖州德清縣主簿樓垵。書寫機宜文字。左朝奉郎、行大理寺丞王師心。右奉議郎、監行在權貨務閻大鈞。右宣教郎、前溫州平陽縣丞郭子欽。幹辦。左朝散郎、主營台州崇道觀李孝恭。提舉錢糧。右丞直郎、前江西提刑司幹辦事穆平。左丞直郎、新泉州永春縣丞王晞韓。右文林郎、前監潭州南嶽廟曹雲。右迪功郎、新潭州善化縣主簿宋有右。從事郎葉

西征道里記 原序

二

光准備差遣、右文林郎、前建州建陽縣尉李若川、點檢醫藥飯食、凡一十五員、左宣教郎、試祕書少監、充樞密行府參謀鄭剛中序。

# 西征道里記

宋 鄭剛中撰

行府舟具。欲發前一日。率執出餞于接待院。二十二日。道銅口。臨平鎮。長安關。宿崇德縣。二十三日。石門。皂林。永樂。由秀州城外。宿杉青關。二十四日。兩界首。宿平望。二十五日。大風阻。吳江不進。二十六日。吳江縣。登垂虹亭。宿平江府。二十七日。許市。望亭。宿無錫縣。二十八日。潘葑。樂社。橫林。宿常州。二十九日。犇牛。呂城關。宿丹陽縣。三十日。新豐。丹徒鎮。宿鎮江府。五月一日。行府官望拜于府庭。二日。會茶丹陽樓。登連滄觀。觀人馬輜重渡。三日。濟渡。至瓜州鎮。楊子橋。宿楊州城外。四日。邵伯關。車樂。宿高郵軍。會茶韓世忠園。五日。樊良丁。至梵水。宿寶應縣。六日。黃蒲鎮。河橋。宿楚州。七日。磨盤。宿淮陰縣。八日。高秋堡。洪澤關。宿濱頭。九日。龜山鎮。宿泗州。僧伽有像而未塔。劉麟嘗因賊翁誕日祝辭。而鐘輒無聲。叩之墜地。麟縱火焚寺去。住持云。十日。治陸。十一日。機宜姚焯等三員。管押激賞庫行。十二日。唐家店。湖口。宿臨淮縣。十三日。中路宿青陽驛。十四日。馬翁店。通海鎮。宿虹縣。城因隋渠爲壕。濬水深闊。城具樓櫓。虹西諸邑。往往皆城。虹獨堅密。豫賊蓋自此爲邊也。隋自虹以上爲陸。木已叢生。縣以東水接淮口。淮地卑。而縣西北隅有湖。

曰萬安。東西百里。北南半之。豫賊引湖擁城。而東南出其流於隋。又淮潮可登三十里。與湖水接。通小舟。若置閘於泗。以時入潮。又略治隘塞。則數十斛之舟。可致宿無疑。或謂引五丈河水入蔡河。上皇奉玉清之所也。由殿後小竹徑。登景命殿。出前廊福寧殿。福寧是謂至尊寢所。簡古不華。殿上有白花石。闊一席地。開祖宗以來。每旦北面拜殿下。遇雨。則南面拜石上。東廡下曰洗面閣。曰司旃閣。餘不能記。由殿後稍北。至坤寧殿。殿屏止畫墨竹。蘆雁之類。然無全本矣。他殿畫此類自福寧至孝思殿。前一殿。卽欽先。欽先奉諸

帝。孝思奉諸后。帳座供具皆在。由欽先出肅雍門。至玉簪堂。規模宏壯。非他位比。後見陝西諸將。自言數對劉豫於此堂。堂左竹徑之上。曰迎曦軒。石爲圍爐。對迎曦曰月榭。榭有御書銘曰。巍然屏石。秀色拔塵。仰止雲寶。乃與月鄰。安符厚德。靜樂深仁。俯鑒沼沚。永固玉春之下。鑲石爲曲水。又至修內司。謂是寶繪堂。兩旁軒閣。不能悉記。復由延春閣下稍東。今太母之故居。不敢詳也。過小門。入錦莊。無雅飾。用羅木作假檀香。堂後有池。左曰挹翠軒。右曰觀瀾軒。上曰棲鸞閣。寢室之旁。曰紫雲閣。中有小圍爐。可坐三人。爐四柱承以雕蓮。入睿思門。登殿。殿左曰玉櫺。右曰清微。後曰宣和。庭下皆修竹。殿後左曰迎真軒。右曰玉虛軒。迎真之上。曰妙有閣。玉虛之上。曰宣道閣。又一殿。忘其名。自此列石爲山。分左右斜廊。爲複道平臺。臺上過玉華殿。由玉華下。入抵後石屏。亦御書。左序有軒。曰稽古。宣和東廡下五庫。以聖德超千古爲號。

皆塗金抹綠小牌。庫上曰翰林司。曰寶印。西廡下曰尙書內省。餘不能記。復由宣和西趨曲水。出後苑。至太清樓下。壁間有御書千字文法帖之類。登瑤津亭。亭在水間。四面樓殿相對。不能徧至。自瑤津趨出。過拱辰門。上馬出。後以閱視所置忠銳。將留二日。京師舊城外。不復有屋。自保康門外。西至太學。道無數家。太學止廊廡。敗屋中。存敦化堂。堂榜猶在。兵卒雜處其上。而牧蕘於堂下。國子監令以養太學生。具詣壁。略如學校。都亭驛東偏廳事棟牌。尙是僞齊年號。糊窗用舉人試卷。見當是試題及舉人文字。專用本朝廟諱。瓊林苑。虜人嘗以爲營。至今圍以小小城。今明池斷棟頽壁。望之蕭然。四日八角鎮。醋溝。宿中牟。五日白沙鎮。圃田。宿鄭州。六日候家莊。須水鎮。宿滎陽縣。滎陽濟水復出之地也。濟入江。不與江合。橫江而出於滎陽。復入地。至陶邱而出。故禹貢記濟水。謂入於河。溢爲滎。東出於陶邱北。往年京師之水。人不知所從。但言鄭州積水不決。蓋濟水也。周德修侍郎云。七日洪溝店。道旁隸三大字。曰漢洪溝。今雖草莽間。似有長坎。然必非楚與漢畫者。又孟店。汜水縣。駕坡子。洛口鎮。宿鞏縣。汜水。卽行慶關也。過關。乃下視大河。與虜營相望。洛河又在大河之南。洛口驛數圍。問之。卽所謂洛口倉者。八日十八里。朝拜昭厚陵。又七里。過黑石頭渡。十里鳳凰臺。又拜五里會聖宮。宿偃師縣。仁廟永昭陵。最與英廟永厚陵近。昭陵因平岡種柏成道。道旁不垣。而周以枳橘。陵四面闕角。樓觀雖存。頗毀亦半。隨闕角爲神門。南向門內列石羊馬駝象之類。神臺二層。皆植柏。層高二丈許。最下約闕十五丈。作五水道。臺前與內門臺及大門外。皆二大

石人對立。欽慈曹太皇陵。望之可見。又號下宮者。乃酌獻之地。今無屋。而遺基歷歷可問。餘陵規模皆如此。厚陵下宮爲火焚。林木枯立。諸陵洛河在前。少室在左。嵩高在右。山川佳氣不改。而室屋蕩然。聞皆爲寶珎所毀。守陵兵卒云。九日。石橋店。白馬寺。宿西京。京號三川者。卽黃河。洛河。伊水也。伊闕又名闕塞山。又謂龍門。大內對伊闕。望王屋不百里。宮牆之內。草深不見遺基。舊分水南水北。居水南者什七八。今止水北有三千戶。水南墟矣。

同程曰。知州翟襄謂予。城外近添五百餘家。

白馬寺。漢明帝所建。今惟瓦礫。府治後圃有堂。曰畫錦。翟襄

所爲。襄本西洛人。今爲鄉郡。故云。十一日。榆林鋪。磁澗。宿新安縣。未至新安十里許。道旁山石一柱裂。勢欲傾危。過者畏仰視。父老與縣令皆言。章聖封永定將軍。半山有廟。月嘗賜錢三十千。然無文識。可攷。十二日。缺門鎮。千秋店。宿沔池縣。行十里。過會盟臺。沔池新安之間。溪山人家。如東浙。用溪石壘牆。十三日。東西土壕。乾壕。宿石壕鎮。杜甫作石壕新安吏二詩。卽其地。是日。陝府安撫吳琦甲馬來迎。

他郡守迎送不錄者。行府專爲

陝西

出也。十四日。魏店。橫渠。宿陝府。十五日。望拜召公甘棠木。舊在府署西南隅。今亡矣。郡有召公原。原盡處。

置府縣七。而夏縣平陸。汧城今皆隔河。夏距城九十八里。卽溫公涑水也。虜瀕河築二小城。時一二騎揭小旗偵邏。或放牧堤上。馬鬣渠在城之東南。虜人破陝所自入。初陝之圍也。郡將李彥仙固守。彥仙遇士



卒有恩。方城中食盡。煮豆以啖其下。而自飲其汁。雪寒單露。將校反加以衣。彥仙復持以予寒者。城破巷戰而死。覆其家。郡之婦人女子。猶升屋以瓦擲賊。哭李觀察不輟。故陝無醜類。父老謂虜久不得城。無食欲去。適有人告以馬鬣渠可入。城遂陷。虜始敢西。而全陝沒矣。十六日。新店。曲屋。宿靈寶縣。縣南五里。卽函谷。十七日。黑曲。稠桑。靜遠鎮。宿胡城縣。十八日。乾伯鋪。盤豆。攢節店。宿閿鄉縣。閿鄉。胡城二縣。元屬虢州。太平興國三年。隸陝府。自府界至虢。三十里。是日。虢守資玘父老迎於胡城之東。胡城南桃林塞。卽武王放牛之地。閿鄉縣治對荆山。一山自秦川起至閿鄉。荆山之西。皆乃秦嶺。退之赴潮陽。度此嶺也。中條在大河北。與潼關相對。又東則首山也。伯夷居水北山南。故謂首山爲首陽。十九日。關東店。潼關。關西店。西嶽廟。行府官謁於祠下。至華陰縣。出南門。朝謁雲臺觀。然後還宿潼關。或謂是古桃林塞。河山之壯。俯視他關。獨城內蕪廢。華州差使臣番休守關。關門北向。入踰半里。大河洶湧。乃涇渭洛三水會處。號三河口。洛水有二。一水自藍田。由商入西京。所謂伊洛者。一水自西夏。由韋鹽之閒。出保安同州。至陝華。與涇渭合。所謂三水之洛。潼關。獨河口下無屏障。道上人馬。河北皆見之。若稍加營治。戍兵其閒。未易踰也。關以西漸與河遠。是日。知華州武功大夫龐迪。甲士迎於關西店。綠祠草創。門右明皇大碑。火後剝裂。有隸數百字。不復逆文。約六丈高。蓋壘石成之。庭下四石闕。裴度出淮西。題名刻其西偏。副使馬摠。行軍司馬韓愈。判官馮宿。李宗閔之徒。不能悉記。雲臺觀屋存無幾。獨聖祖并章聖皇帝御容所在。曰會真殿。無

恙。壁間卽像如新。老道士云：以南極壽星榜其上給虜，故得不毀。觀後希夷祠堂，堂前石刻太宗皇帝御書并詩，詩有蒼生往世弊凋殘，今我如同赤子看，大闢無爲三教盛，承平方說四方寬之句。又一章有霞成鶴骨，餌藥駐童顏，靜想神仙事，忙中道路閑。注：萬謂朕中亦得悟，務忙道之閑也。又一章：曾向前朝出白雲，後來消息杳

無聞。如今若肯隨徵詔，總把三峯乞與君。章聖皇帝賜道人鄭隱一章：有酣醉皮裘思晦迹，行高終自有。人知。又一章：賜鄭隱歸山，盡日臨流看水色，有時隱几聽松聲，徧遊萬壑成嘉遁，偶出千峯翫治平。仁宗皇帝賜武元亨一章：只向身邊有大還，胎神月殿在秋天，三靈密像誰分別，尸質清虛本自然。詩石皆無毀闕。老道士又指一古槐，謂是無憂木，希夷嘗藏書槐腹中，觀依華山而立。蓮華峯，仙人掌，石月，玉女盆，二十八宿明星館，石鼓山皆在最高處，獨蓮華峯，仙人掌可望而見。蓮峯下有瀑布水簾，仙人掌石間隱然有跡，如人對面出右手上擎偃月，玉女盆，卽杜甫所謂安得仙人九節杖，拄到玉女洗頭盆是也。雲臺西卽劉禹錫所見道士種桃若霞之處，所謂玄都觀者，今亡矣。華山書疏謂華山十字，分之四隅爲四州，蓋謂東北爲冀，東南爲豫，西南爲梁雍，又土人言有康通判者，嘗與東坡爲僚，踰百歲，從弟子四五人往來諸峯間，無定處，然土人不能具道其名。又有道士能言張確之子密，爲豫賊守華，嘗題詩曰：羣山起伏朝靈嶽，恰似千官奉至尊。吳蜀未平宜假手，願將餘力致乾坤。二十一日，敷水鎮柳子店，將相鄉，按石刻，乃

郭汾陽之里。宿華州。州治對少華。對太華者。華陰也。二十一日。赤水鎮。東西陽村。宿渭南縣。二十二日。零口鎮。新豐市。道北一里。有馬周廟。宿臨潼縣。華清宮之西館。宮後卽驪山。新豐古城。故驪戎國。故山以驪名。山間宮殿基址皆在。連理木在長生殿之上。蓮花湯發自山足。爲石渠。引泉入室。雕白石爲蓮。開十竅以湧泉。號白蓮池。卽妃子浴所。次太子泉。次百官泉。雖蒙故號。僕隸今游之。獨白蓮尙浴士大夫。西館卽當時遊幸梨園憩寓之地。明皇自臨瀋爲複道。往來長安。按石刻。可盡見。今止有玉石像一軀。立荒廟中。二十三日。灞水漲。不進。是日。知永興軍。節制諸路軍馬張中孚。渡輕舟來迎。二十四日。灞橋鎮。灑水。長樂坡。宿永興軍。軍以漕居爲府治。後有涼榭。別爲一區。堂下張芸叟輩數人題名刻石。東門外興慶池。乃明皇藩邸。灞橋漢周勃以下迎文帝之地。常樂坡。唐人餞眞卿使希烈之塘。鄠縣。夏之扈國。府西北一百五十里。卽奉天。奉天元隸乾州。熙寧五年廢乾。故隸府。二十五日至七月七日。行府並治事。永興軍。八日。楮林店。沙坡。偏店。宿咸陽縣。縣在渭水之東北。未渡渭二里許。有故墟。謂是舊咸陽。自楮林道旁土塹。西入十里。卽未央宮基。又蒼頡制書臺。樽里子墓。皆渭河南。不及至也。是日。環慶帥趙彬甲士迎于咸陽橋。九日。魏店。馬跑泉。高店。宿興平縣。馬跑泉。高店之間。塚土數尺。高拱雜木。二三本。曰楊妃塚。十日。東陽臺。馬嵬坡。東扶風。宿武功縣。馬嵬旁短牆周圍。路人指謂妃子死所。縣之報本寺。唐太宗所生之第。殿後一堂。中有神堯像。而繪諸帝于壁。報本之東。又有大佛閣。寺僧亦謂是李氏故居。實太宗之所生。未能詳也。自

榮陽以西皆土山。人多穴處。謂土理直。無摧壓之患。然見路旁高山多摧折。存者尙如半掌。則土穴疑有壓者。居人常自能擇爾。惟武功大佛旁一洞。數里遠。報本寺僧云。洞置自巢賊時。今人又增穿之。中間避亂千餘家。入其中。虜知而不能取。陝西往往爲洞。皆所不及。穿洞之法。初若掘井。深三丈。卽旁穿之。自此高低橫斜。無定勢。低處深或四五十丈。高處去平地不遠。烟水所不能及。凡洞中土。皆自初穿井中出之。土盡洞成。復築塞其井。卻別爲入竅。去竅丈許。爲仰門。陳勁弩。攻者遇箭卽斃。如是者數重。時於半里一里餘斜氣穿道。謂之哨眼。哨眼或因牆角。與夫懸崖積水之旁。人不能知。其下繫牛馬。置礮磨。積粟鑿井。無不可者。土久彌堅。如石室。但五年前一洞壓死者千餘人。僧云。此亦天數。然今陝西遺民。半是土洞中生。今人居者。頗憊覆壓之禍。於洞下多立柱布仰板矣。武功今屬醴州。是日知州武功大夫趙立來迎。十一日杏林店。邏店。宿扶風縣。十二日東新店。龍尾坡。青陽店。宿岐山縣。后稷封有郃。岐山卽其地。或謂別有郃城。今榮鄉是也。又云郃之榮亭。或謂是武功。皆未能詳。郃縣在府東南百里。有塢卽董卓所築。是日涇原帥張中彥。知鳳翔府賀景仁來迎。十三日任官村。橫水店。至鳳翔府。古扶風郡。壤地饒沃。四川如掌。長安猶所不逮。岐山之陽。蓋周原也。平川盡處。修竹流水。彌望無窮。農家種床尤盛。生民之詩曰。維糜維芑者。蓋謂床也。俗今書糜爲床。秦州有床穰堡。床米類稷。可麪可餅。可爲碁子。西人飽食麪。非床猶飢。將家云。出戰糗糧乾不可食。嚼床半掬。則津液便生。餘物皆不咽。士卒用小布袋置馬上。遇水取袋漬潤。

之尤美。邊郡刈床。則自外而內。刈麥。則自內而外。蓋床以寒熟。麥以暖熟故也。府置廳事。李希烈所建。無甚雄大。而四面出簾。制度如殿。後圃辟蕩堂。東偏中和燕申二堂。亦舊屋。餘皆近剏。東北隅有凌虛臺。東坡嘗記之。臺高纔二丈。不見凌虛之勢。然水竹幽勝可喜。燕申堂後。龜趺大刻。蓋茂正德政碑。後人磨去。刻維摩頌。游師雄後刻九成宮圖於其陰。九成宮。隋仁壽中所建。去州百里許。按圖大略與驪山相似。以有圖且不親到。故不詳載。師雄記謂文帝遣楊素營之。土木之役困一時。死傷甚衆。宮旁夜鬼哭。文帝聞而怒。獨孤后爲言於帝。乃解。後遂與后每歲避暑。多遊樂不歸。東有華清。西有九成。訪遺跡。則見隋唐之不競也。寶雞縣府西南六十五里。本秦武公所都。所謂陳倉者。自是入大散關。河池。河池在漢爲故道爲西蜀之

吭。虜之犯蜀也。吳玠旣敗走之。道迷不能出。糧且盡。垂軍待斃。趙立爲畫歸路。乃得脫。其後立又爲先驅。道之虜再入。而玠少卻。十四日至八月十九日。行府皆治事。鳳翔新鄭延路經略使郭浩。熙河路經略使楊政。秦鳳路經略使吳玠。四川都轉運使陳遠。猷以下各稟議分職而退。二十日。行府遵舊路歸。次舍道理如故。獨至泗州。由平源。天長。大儀出鎮江府。然後舟行。陝西兵歸者。禁軍合計三萬四千有奇。雖分隸諸帥。然各有將分逐。將仍存正副。蓋祖宗之軍政舊法猶在也。涇原禁軍僅八千。比諸路爲勁。而涇原勁兵盡在山外。陝西弓箭手舊一十六萬。今存七萬。復以土田不均。古破無法。雖七萬人未必可用。夏國主

興州謂之衙頭。衙頭至麟府路近處可九百里。秦鳳六百里。環慶三百里。會州界二百五十里。諸路今與西界接壤。惟鄭延最闊。熙河會川城至涇原甘泉堡止百里。以北皆西界也。夏國左廂監軍司接麟府沿邊地。分管戶二萬餘。石州監軍司接慶州保安軍延安府地。分管戶四萬餘。靈州監軍司接涇原環慶地。分沿邊管戶一萬餘。茲其大略也。某自吳踰淮道京入洛至關陝。其所經歷得於聞見者。靡不具載。竊觀今日天下之勢。東南爲天子駐蹕之區。朝廷臺省監司守令耳目親近之地。故治具比他道爲修。陝西諸郡雖號新復。然自渠魁元惡用意變易三綱五常之外。自餘軍民無不內懷天日。相與持循檢約。未敢有無國家毀法度之心。故其風俗綱紀視東南猶整齊也。獨京西京畿與夫接淮甸之地。一時陷沒於劉豫兇威虐焰之中。郡邑無民。官府無法。田野未耕。荒穢猶在。如久病困瘁之人。頭目手足皆有生意。而中焦痞澗。蓋未易全復也。朝廷誠能精選長吏。審擇牧守。仍於三京量戍士夫。使之撫視凋瘵。修治關塞。於年歲間生養氣血。與東西上下脈絡流通。則天下平矣。